

宋詩紀事

宋詩紀事

宋詩紀事卷十

錢唐官屬鶚

緝

祁門馬曰琯

同緝

李淑

淑字獻臣徐州豐人少傳若谷子年十二獻文行
在真宗賜童子出身授校書郎景祐初知制誥除
翰林學士累官戶部侍郎出知河中府卒贈尚書
右丞有李公詩苑類格及別集

題周恭帝陵

弄楯牽車挽鼓催不知門外倒戈迴荒墳斷隴纔三尺猶
認房陵半仗來

東軒筆錄淑在翰林奉詔撰陳文惠公神道碑李爲人高亢少許可文章尤尚奇澀碑成殊不稱文惠之功烈文章但云平生能爲二韻小詩而已文惠子述古等懇乞改去二韻等字答以已經進呈不可刊削述古極銜之會李出知鄭州奉時祀于恭陵作詩云云述古諷寺僧刻石俄有以詩上聞者學士葉清臣等言本朝以揖遜得天下而淑誣以干戈仁宗亦深惡之遂落李所居職

題滑州廡

滑守如今是世官
阿戎出守自金鑾
郡人莫訝畱題別
孫息期同住此看

青箱雜記李復圭三世皆知滑州天聖中其祖康靖公若谷知慶歷中其父邯鄲公淑又知後八年復圭又知前此邯鄲公嘗迎侍康靖題詩于州廡云云後復圭刻石記其事曰仰承遺訓允契冥兆茲亦異也

朱巽

巽揚州天長人真宗朝官至工部侍郎守雍州子壽昌因母劉被出棄官尋至同州得焉以孝聞天

下

句

塞垣古木含秋色祖帳行塵起夕陽

送劉綰學士出守并門 詩話總龜

成銳

銳許州臨潁人應制科高第嘗以詩獻王丞相隨

句

綵檻應無分春風不借恩

野菊 詩話總龜

林 垌

垌福州羅源人真宗朝特奏名有南華集

詠瑞檜

古殿當年欲葺時槎牙高檜礙簷榱人間斤斧難容手天

上風雷爲轉枝烟色併來春益重月華饒得夜相宜吾皇
一駐鑾輿賞從此聲名四海知

陳郁話映真廟朝寢殿側有古檜秀茂不羣名御愛檜然橫礙殿簷具皇
意欲去之一夕風雷轉摺其枝因以爲瑞題詠者多唯羅源林垌唐律稱
旨賜號南華翁詩名由此大顯

李 畋

畋蜀人與任介郭震爲莫逆交仕至尚書郎

送鈐轄館使王公

郤縠詩書奕世傳西人歌德別戎旃三朝功業標勳府四
稔恩綏播蜀川耦射隔花聞破帖分題臨沼閒中筵歸朝
聖旨俞僉望畿內封侯養重權

成都文類

程 戡

戡字勝之陽翟人舉進士仁宗朝擢再知益州累
官戶部侍郎樞密副使尋拜鄜延路經畧安撫使
英宗卽位召還道卒贈太尉謚康穆

送鈐轄館使王公

歸騎翩翩去路賒鬱蔥佳氣望天涯艱危劒閣三千里惠
愛刀州十萬家龍尾道邊瞻日彩鹿頭關外別春華金明
扈從宸遊處休憶連年泛浣花

成都文類

靳宗

送鈐轄館使王公

再任坤維報政成紫泥恩詔下神京搖鞭有客添歸興折
柳何人不愴情杜宇江山經鳥道海棠池館憶龜城尊前

執手難收淚投分從來比弟兄

成都文類

王景

送鈐轄館使王公

四稔總兵鈐輕裘叔子慙抗棱遐徼伏敦信遠民詣赴名
薰風布離襟臘酒酣吾皇思將帥有意在江南

成都文類

解程

送鈐轄館使王公

武帳推恩詔十行雍容鳴玉覲清光四年愛日民謠浹五
月炎風驛路長劒閣煙雲迷去旆柳營笳鼓慘離觴浣花
紙貴傳新集畱得詩名繼許昌

成都文類

黃

均

送鈐轄館使王公

四年軍法表巴邛歸騎俄乘紫漢風家緒舊傳三檠貴將
材元蘊萬人雄錦城離思雲容斂山國行章旆影紅到日
定知新渥重主寮今是黑頭公

成都文類

姚 渙

送鈐轄館使王公

家傳勲力世能賢四載坤維領帥權南詔酋豪彌款附西
州士庶賴蕃宣輸忠感慨由誠府接下恩勤自意筌月夕
過從多命席花時酬唱旋成編雅歌餘暇軍容肅陟狀升
聞帝願延馳驛遽趨三召節執圭俄覲九重天漢廷儀衛
咸祗若蜀郡名僚共黯然賜對定應畱晷刻疇庸當便進

班聯聖神倚注期蕃錫宥密崇高待九遷下客塵勞遇知
已願言攀附跂英躔

成都文類

田瑜

送鈐轄館使王公

閫外膺宸寄坤維握虎兵真純逾璞玉方重敵長城
宵構詩名著承家將畧明四年凝茂績一節促歸程
水際旌旗影風前鼓吹聲西州懷惠愛北闕被恩榮
護衛親嚴近雍容侍穆清分攜暫銷黯良會在神京

成都文類

高惟幾

惟幾官殿丞

送鈐轄館使王公

遊宦俱爲關外人與君五看海棠春園林選勝聯鐺徧風
月相思命駕頻大旆先時辭蜀道短轅何日見京塵子牟
又起離羣恨欲操行袂重愴神

成都文類

海棠

故國庸岷外孤根楚苑中使梅休妬白仙杏已饒紅旋恐
陽城破尋憂下蔡空幾時夢巫峽獨立怨春風

海棠譜

張靖

送鈐轄館使王公

保塞昔年嘗閉壘甘陵今歲又勞師將軍鎮蜀功多少不
見干戈出虎皮

玉勒嘶風出錦城山光野色助離情行行莫倦神華遠芳

草連雲伴去程

成都文類

范諷

諷字補之齊州人舉進士第累官翰林侍讀學士

給事中知兗州遷光祿卿

儒林公議范諷性疎誕嘗忤外計求監舒州靈仙觀莊獻太后臨朝聞其俊邁召拜諫官好朋飲高歌噉呼或不冠幘禮法之士深疾之顏太初作東州逸黨詩以譏之

題鼎州甘泉寺

平仲酌泉回北望謂之禮佛向南行烟嵐翠鎖門前路轉
使高僧厭寵榮

湘山野錄鼎州甘泉寺介官道之側嘉泉也便于漱酌行客未有不舍車而留者始寇萊公南遷日題于東檻曰平仲酌泉經此回望北闕黯然而行未幾丁晉公又過之題于西檻曰謂之酌泉禮佛而去後范補之安撫湖南留詩于寺云

題濟南城西張寺丞園亭

園林再到身猶健官職全拋夢乍醒惟有南山與君眼相

逢不改舊時青

能改齋漫錄

石延年

延年字曼卿一字安仁其先幽州人家宋城真宗

錄三舉進士爲三班奉職歷太子中允同判登聞

鼓院有集

歐公詩話曼卿卒後其故人有見之者云恍惚如夢中言我今爲鬼仙也
所主芙蓉城欲呼故人往遊不得忿然騎一素驪去如飛其後又云降于
亳州一舉子家又呼舉子去不得因畱詩一篇與之余亦畧記其一聯云
鶯聲不逐春光老花影長隨日腳流神仙事怪不可知其詩頗類曼卿平
生語舉子不能道也

詩林廣記石曼卿詩如飢鷹乍歸迅速不可言

隱居詩話石延年長韻律詩善敘事其他無大好處籌筆驛銅雀臺畱侯
廟詩爲一集之冠五言小詩如海雲含雨重江樹帶蟬疎平蕪遠更綠斜

日寒無輝者幾矣

桐江詩話曼卿一日春初見堦砌初生之草其屈如鉤而顏色未變因得一句云草屈金鉤綠未回遂作早春詩一篇旬日方成曰簷垂冰筋晴先

滴草屈金鉤綠未回其不逮先得之句遠甚
雞肋集曼卿以天聖四年來令金鄉故詩爲此邑人作者如題張氏園亭
詩云樂意相關禽對語生香不斷樹交花尤爲佳句也
文獻通考張浮休評曼卿詩如飢雁夜歸巖冰秋折俊爽有餘不可尋繹

題孫可久別墅

南北霑河潤幽深在禁城疊山資遠意讓俸買閑名閉戶
斷蛛網折花移鳥聲誰人識高趣朝隱石渠生

青箱雜記仁宗朝內臣孫可久賦性恬淡年踰五十卽乞致仕都下有居
第堂北有小園城南有別墅每良辰美景以小車載酒優遊自適曼卿過
其居題詩云云

平陽代意一篇寄師魯

十年一夢花空委依舊山河損桃李雁聲北去燕西飛高

樓日日春風裏眉比石州山對起嬌波淚落妝如洗汾河
不斷天南流天色無情淡如水

澠水燕談石曼卿天聖寶元閒以歌詩豪于一時死後故人關詠夢曼卿
曰生平作詩多矣獨常自以爲平陽代意一首最爲得意而世人罕稱之
能令予此詩盛傳于世在永言耳詠覺增廣其詞隱度以迷神引聲韻于
是天下爭歌之他日復夢曼卿來謝

下第偶成集句

一生不得文章力欲上青雲未有因聖主不勞千里詔娉
娥何惜一枝春鳳皇詔下雖霑命豺虎叢中也立身啼得
血流無用處著朱騎馬是何人

年去年來來去忙爲他人作嫁衣裳仰天大笑出門去獨
對春風舞一場

西清詩話

曹太尉西師

仁者雖無敵王師尚有征獨乘金廐馬都領鐵林兵肅氣
關河暮屯烟部落晴旗光秋曉合甲色夜江橫士喜擊中
鼓虜疑聞後鉦無私乃時雨不殺是天聲濯濯前誰拒堂
堂彼自傾寒踰博望塞春宴隗囂城外使戎心伏旁資帝
道平公還如畫像爲贊學班生

金鄉張氏園亭

亭館連城敵謝家四時園色鬪明霞窗迎西渭封侯竹地
接東陵隱士瓜樂意相關禽對語生香不斷樹交花縱遊
會約無畱事醉待參橫月落斜

以上宋文鑑

籌筆驛

漢室虧皇象坤乾未卽寧姦臣與逆子搖嶽復翻溟權表

分江城曹袁鬪夏蚬虎奔咸逐逐龍臥獨冥冥從衆非無
術欺孤迺不經惟思恢正道直起復炎靈管樂韜方畧關
徐駭觀聽一言俄遇主三顧已忘形南旣清蠻土東期赤
魏庭出師功自著治國志誰銘歷劒兵如水臨秦策若瓴
舉聲將潰虜橫勢欲逾涇仲達恥中惻辛毗嚴壁局可煩
親細務遽見墮長星戰地悲陵谷來賢賞德刑意中流水
遠愁外遠山青想像音徽在侵尋毛骨醒遲畱慕英氣沈
歎撫青萍

中山詩話石曼卿獨行京師一豪士揖之曰公幸過我同入委巷抵大第
歌舞歡醉再書爲揮籌筆驛數詩以金帛數百千贈之他日遇諸塗又遺
以白金數兩謂曰詩中意中流水遠愁外遠山青最爲佳句
蘆浦筆記石驛在蜀中綿州石曼卿爲諸葛武侯賦也寶元二年大書以
遺朱復之後二年朱爲四明節度推官遂刻石于廳事